

**Isu air: Bertahun lamanya Singapura ambil kesempatan, ini dah 'mengarut' -
Tun Mahathir
Astro Awani
19 Januari 2019
Najib Aroff,**

OXFORD: Harga semasa jualan air mentah kepada Singapura adalah sangat tidak adil dan ia perlu disemak semula, tegas Perdana Menteri Tun Dr Mahathir Mohamad.

“Kami sudah cuba berunding (pada 1962), Singapura enggan. Malah Singapura enggan membawa kes ke mahkamah.

“Singapura membeli air pada kos RM0.03 untuk seribu gelen dan menjual kembali air dirawat kepada Malaysia pada nilai AS\$60 untuk jumlah yang sama.

“Ini tidak masuk akal pada masa kini. Adakah harga tidak pernah berubah sejak 1926? Harga ini mungkin boleh diterima pada ketika itu, namun kini ia tidak boleh diterima,” katanya ketika menjawab soalan salah seorang peserta ketika berucap di Kesatuan Oxford pada Jumaat.

Pesereta dari Singapura itu sebelum itu bertanyakan tentang tindakan kerajaan Malaysia yang dipimpin Tun Mahathir kini didakwa seolah-olah mahu mengulangi diplomasi berkonfrontasi dengan Singapura.

Tambah Tun Mahathir, Malaysia akan terus berpegang kepada prinsip ini kerana Singapura telah menikmati keuntungan sejak sekian lama dari hasil harga air yang terlalu rendah.

“Kos rawatan air adalah sangat rendah jadi Singapura menikmati untung besar.

“Saya benci untuk bercakap perkara ini secara terbuka, saya lebih suka beritahu kepada pemimpin Singapura, tetapi memandangkan soalan ini ditanya, saya beritahu harga ini adalah sangat tidak adil,” tegas Mahathir.

Beliau menambah Malaysia hanya mahukan penetapan harga baharu yang lebih adil dan bukannya meminta harga yang terlalu rendah.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/isu-air-bertahun-lamanya-singapura-ambil-kesempatan-ini-dah-mengarut-tun-mahathir-196421>